

## **PAULO ENA REVAREVA FILIPI TAUDIA EDIA**

<sup>1</sup> Paulo bona Timoteo, ai Iesu Keriso ena hesiai taumai, ese umui Keriso Iesu ena helaāga taumui iboumui ai Filipi ai o nohomu, bona heitatao tau-mui bona diakono taumui, a tore henimuimu:

<sup>2</sup> harihari-bada bona maino, Tamada Dirava ena amo bona Lohiabada Iesu Keriso ena amo, bavabi.

### *Hahenamo herevadia*

<sup>3</sup> Na lalomuimu negadia iboudiai egu Dirava na hanamoamu;

<sup>4</sup> bona umui daimui ai na noinoimu negadia iboudiai, na ġuriġurimu mai moalegu ida;

<sup>5</sup> badina be lalomui ai o matamaia dinana ema bona hari, sivarai namo ġaukarana ai o kahagu dainai.

<sup>6</sup> Badina be dibagu kara namo lalomui ai e mata-maia Diravana ese baine haġuġurua, ela bona Iesu Keriso ena dina.

<sup>7</sup> Umui iboumui ai ini na lalomui tomamu na maoro, badina be lalogu ai na lalomui taomu; dibura rumana ai na nohomu ai bona sivarai namo na gwauraiamu ma na hamomokaniamu ai, umui bona lau harihari-bada tame abia hebou.

<sup>8</sup> Dirava hari dibana, Keriso Iesu ena hebogahisi ai umui iboumui ai na ura henimui lalo-dikamu.

<sup>9</sup> Egu noinoi binai: emui uraheni baine vara badabada mai diarina bona mai aonegana ida;

<sup>10</sup> bena āgau namodia toadia ba diba, bona ba noho mai āgoevamui, asi bebeka-bebekamui, ela bona Keriso ena dina.

<sup>11</sup> Kara maoromaoro huahuadia ai ba honu; idia na Iesu Keriso ena amo e maimu, Dirava iheatalaina bona ihanamona totona.

### *Egu noho*

<sup>12</sup> Varavaragu e, na uramu ba diba, egu ai e vara āgaudia na sivarai namo ihapere-rohorohona āgaudia ai vada ela.

<sup>13</sup> Gaubada ena hegima oreana idoinai bona tau-nimanima iboudiai gabu idau-idau ai danu dibadia lau na Keriso dainai dibura rumana ai na nohomu;

<sup>14</sup> bona varavaragu na gwauraidiamu taudia na lau īguigu dainai lalodia eme goada Lohiabada lalonai, bena Dirava ena hereva e gwauraiamu mai goadadia ida, asie garimu.

<sup>15</sup> Momokani, haida ese Keriso na vaēge ai bona heai ai e harorolaiamu; a haida be lalo-namo ai e harorolaiamu.

<sup>16</sup> Ini idia na uraheni dainai e haroromu; dibadia lau na sivarai namo ihamomokanina dainai na ginimu.

<sup>17</sup> Unu idia na heiri-heiri dainai e haroromu, dia lalodia amo; dibura rumana ai na nohomu ai egu hisihisi bae habadaia e tomamu.

<sup>18</sup> Herevana! Dibaka ai eiava momokani ai Keriso e harorolaiamu; una dainai na moalemu.

<sup>19</sup> Oibe, bona baina moale. Badina be lau dibagu ini amo hahemauri baina abia, emui noinoi daidiae, bona Iesu Keriso ena Lauma ena hekaha dainai.

**20** Egu ura bada bona egu helaro bini: ġau ta ai basina hemarai, a nega idoidiai heġereġeredia harihari danu baina goada mo; bona maurigu ai eiava masegu ai lau taugu ese Iesu baine imodaia.

**21** Badina be lauegu ai mauri be Keriso, a mase amo ġau namo-hereana baina davaria.

**22** A taugu ai bama mauri noho, egu ġaukara anina bama itaia; una dainai asi dibagu edena baina abia hidi.

**23** Egu ura na rua; na daradaramu. Na ura badamu Keriso dekena bainala; una bema namo herea.

**24** To umui daimui ai taugu ai baina noho baine namo.

**25** Una na dibagu; bena na laloamu do baina noho, umui ida baita noho hebou, emui abidadama bona emui moale ihabadana.

**26** Taunabunai, Keriso Iesu lalonai emui heāgi baine bada, badina be lau na umui dekemui ai dainai.

### *Emui noho*

**27** Ĝau tamona, Keriso ena sivarai namo iha-heġereġerena karadia mo ba kara; bena baina vasi itamui eiava dauhai mo harimui baina kamonai, lau baina diba umui na lalo tamona ai o gini tutuka-tutukamu, bona ura tamona ai sivarai namo ikamonai-henina o goadalaiamu.

**28** E inai henimuimu taudia na garidia basio gari; una na idia edia mase toana, a umui emui ai Dirava ena hahemauri toana.

**29** Vada e henimui hariharina binai: dia Keriso iabiabiraina mo, a hisi ianina danu ia dainai.

**30** Emui tuari be o itaguva na goadalaiava bona o kamonaimu doini na goadalaiamu tuarina.

## 2

*Ba maino*

<sup>1</sup> Taunabunai, Keriso ena lalo-hakeru bema mia, uraheni ena tauhalo bema mia, Lauma ena hetura-heheni bema mia, hebogahisi bona hekaha bema mia,

<sup>2</sup> umui ese egu moale boma haḡuḡurua, lalomui boma hatamona, emui ura hen i boma hatamona, emui lalo-hadai boma hatamona.

<sup>3</sup> Ġau ta basio karaia heiri-heiri dainai eiava hekokoroku dainai; a ta ta sibomui ba hahemanau, bamomui ba imodaidia.

<sup>4</sup> Bona ta ta ena namo ena namo basio tahu, a bamomui edia namo ba tahu.

<sup>5</sup> Keriso Iesu lalonai e miava darana umui lalomui ai danu baine mia.

<sup>6</sup> Ia hari, ena be Dirava anitarana e abia, ena be ia Dirava ida vada e heḡereḡere, to se haeroa una na baine Dogoa tao ḡauna.

<sup>7</sup> Ia ese sibona e hekaruhia hebubu, hesiai merona anitarana e abia, taunimanima oromana ai e vara,

<sup>8</sup> ita-itana na taunimanima na heto. Bena sibona e hahemanau, Dirava e kamonai henia ela bona mase, oibe, satauro ena mase.

<sup>9</sup> Una dainai Dirava ese e imodaia, lada ta e henia, lada iboudiai e hereadia ladana;

<sup>10</sup> bena Iesu ladana dainai guba ḡaudia bona tanobada ḡaudia bona tanobada henuna ḡaudia iboudiai tuidia bae hadai;

<sup>11</sup> bona mala iboudiai ese Keriso na “Lohi-abada” bae gwauraia, Tamada Dirava iheatolaina.

<sup>12</sup> Egu lalokau taumui e, nega idoidiai lau vairagu ai o kamonai henigu; harihari, lau murigu ai, emui kamonai ba habadaia,

mai garimui bona mai heude-heudemui ida ihamaurimui ba tahua.

<sup>13</sup> Badina be Dirava ese ena ura namodia iurahenidia bona ikaradia na lalomui ai e havaramu.

<sup>14</sup> Gau iboudiai asi emui maumau asi emui hepapahuahu ba kara;

<sup>15</sup> unu amo Dirava natuna ai baola, asi toutoumui, asi bebeka-bebekamui, bona asi emui kerere, uru gageva-gagevana mai gwau-edeedena bogaraginai. Idia padadiai ba hedinarai, tanobada ena diari na heto.

<sup>16</sup> Mauri herevana ba hahedinaraia, bena Keriso ena dina ai lau na do baina moale, bainato “Asina heau kava, asina hekwarahi kava”.

<sup>17</sup> Ena be lau raragu baine hebubu, emui abidadama karadia ihahelağadia, to baina moale, bona baita moale hebou;

<sup>18</sup> umui danu ba moale bona baita moale hebou.

### *Timoteo baina siaia vasi*

<sup>19</sup> Lohiabada Iesu lalonai na laloamu asi vanahana Timoteo baina siaia vasi, bena harimui baina kamonai, lalogu baine keru.

<sup>20</sup> Badina be dekegu ai ta lasi ia heğereğerena; ta lasi umui baine reğumui ia baine reğumui heğereğerena.

<sup>21</sup> Badina be iboudiai na sibodia edia ġau e tahumu, a Iesu Keriso ena ġau asie tahumu.

<sup>22</sup> A ia toana be dibamui: mero ese tamana isiaina e lao henimu na heto, ia ese lau isiaigu vada e lao hen, sivarai namo dainai.

<sup>23</sup> Taunabunai egu helaro be asi vanahana ia baina siaia vasi, lau ede baina heto baina diba negana ai.

<sup>24</sup> A Lohiabada na abidadama heniamu, nega basine daudau lau danu baina vasi.

*Epafroditō be vasimu*

<sup>25</sup> Lau na tomamu tadigu Epafroditō, ġaukara ai bona tuari ai e bamogumu tauna, o siaia egu dabu ai baine kahagu tauna, ma aina siaia vasi.

<sup>26</sup> Badina be e lalomui badamu, bona lalona e hekwarahimu, ena gorere harina o kamonai dainai.

<sup>27</sup> Momokani e gorerea, mokona e mase, to Dirava ese e bogaia hisi, bona dia ia mo a lau danu e bogagu hisi, egu lalo-hisihisi baine bada herea na garina.

<sup>28</sup> Una dainai aina siaia vasi na tomamu. Ba itaia lou, bena ba moale; lau danu egu daradara baine maraġi.

<sup>29</sup> Benaini, Lohiabada lalonai bavabia dae mai moalemui ida; bona kara unuhetomadia e karamu na taudia danu iboudiai ba matauraidia.

<sup>30</sup> Badina be Keriso ena ġaukara dainai mokona e mase; ena mauri e dadaraia, emui hebogahisi egu ai baine haġuġurua totona.

### 3

*Sisiba herevadia*

<sup>1</sup> Benaini, varavaragu e, Lohiabada lalonai ba moale. Hereva tamona na torea louloumu, asina hesikumu; badina be ia ese umui baine hamaurimui.

<sup>2</sup> Sisia nahuadia ba toho; dika ikarana taudia nahuadia ba toho; heiva kava taudia nahuadia ba toho.

<sup>3</sup> Badina be peritome korikori be ita: ita, lauma ai Dirava ta toma henia dihomu, bona Keriso Iesu

ta heāgilaiamu, bona tau-anina asita abidadama heniamu, tauda.

<sup>4</sup> Lau ese tau-anina bama abidadama henia diba; ena be tau ta ese tau-anina bema abidadama henia, to lau ese bama hereaia.

<sup>5</sup> Na vara, dina ihataurahanina ai e peritomegu. Lau na Israel besena taugu, Beniamina ena iduhu taugu. Senegu danu Heberu taudia. Taravatu ibadinana ai lau be Farisea taugu.

<sup>6</sup> Egu goada na hahedinaraiaava, ekalesia oreana na dağedağe heniava. Taravatu ena kara maoromaoro ibadinana ai lau na asi bebeka-bebekagu.

<sup>7</sup> A gunaguna e hanamolaigu ġaudia iboudiai harihari Keriso dainai dikadia na gwauraimu.

<sup>8</sup> Oibe, ġau iboudiai na dadaraimu, a ġau herea-daena, Keriso egu Lohiabada baina dibaia ġoevaġoeva, na helao realaiamu; ia dainai ġau iboudiai vada na haboiodia, negenege ġaudia ai vada na halaodia, Keriso baina abia tarika-tarika helao reana.

<sup>9</sup> Bena ia lalonai bae davarigu, dia taravatu ai na kara maoromaoro dainai, to Keriso ibadinana ai na kara maoromaoro dainai; Dirava ese eda abidadama dainai e henidamu kara maoromaorona bunai.

<sup>10</sup> Bena ia bona ena toreisi-lou siahuna baina diba; bona ia e ani hisidia lau danu baina ani, ena mase dalana ai danu baina mase.

<sup>11</sup> Unu amo mase amo toreisi-louna baina ġavaia.

<sup>12</sup> Lau asina tomamu vada na abia, eiava vada na ġoeva dae. Doini na ġavaiamu, baina abia na tomamu, Keriso Iesu ese lau e abigu na heto.

<sup>13</sup> Varavaragu e, asina tomamu vada na abia; a kara tamona na goadalaiamu, murigu ġaudia

name lalo boio, vairagu ġaudia na ġavamu;

<sup>14</sup> dokona na heau heniamu, davana baina abia na tomamu; una dava be Keriso Iesu lalonai Dirava ese e boirida dae.

<sup>15</sup> Benaini, mai darada tauda iboudaiunu baita kara toma; a umui haida lalomui bema idau, Dirava ese lalomui baine hadiaridia.

<sup>16</sup> Ĝau tamona, vada ta davari ġaudia heġereġeredia ai baita raka.

<sup>17</sup> Varavaragu e, lau ba ġavagu hebou, bona ai e haġoimaimu taudia na ba haerodia.

<sup>18</sup> Badina be vada na hamaoromui gunava, bona mai taigu ida na hamaoromui loumu, haida na e raka kereremu, Keriso ena satauro e inai heniamu.

<sup>19</sup> Dokodia na mase; edia dirava na bogadia; edia heaġi na edia hemarai karadia; edia helalo na tanobada ġaudia.

<sup>20</sup> A ita eda hanua konkori na guba ai; eda helaro be Ihamaurida Tauna, Lohiabada Iesu Keriso,unu amo bainema.

<sup>21</sup> Ia ese ini tau-anida manokadia baine hamatamata, ia tau-anina ġoева-daena heida-idana ai baine halao; badina be ia siahuna vada e heġereġere ĝau iboudiai baine hamanada.

## 4

### *Hahetoni herevadia*

<sup>1</sup> Taunabinai, varavaragu e, egulalokau taumui, na ura henimuimu taumui, egumoale badina, egudagi toana: lalokau e, Lohiabada lalonai ba gini tutuka-tutuka.

<sup>2</sup> Euodia bona Sunutuke na noidiamu, lalodia bae tamona Lohiabada lalonai.

<sup>3</sup> Oi danu, o kahagumu taumu e, ene hahine ba kahadia, badina be idia na lau ida a ġaukara hebouva, sivarai namo ena; Klemento bona lau ida a ġaukara hebouva taudia oredia danu. Idia ladadia na mauri bukana ai vada e tore.

<sup>4</sup> Nega idoidiai Lohiabada lalonai ba moale. Ma na gwau loumu: ba moale.

<sup>5</sup> Emui lalo-manau na taunimanima iboudiai bae diba. Lohiabada vada eme kahikahi.

<sup>6</sup> Ĝau ta basio lalo haguhilaia; a ĝau iboudiai ĝuriġuri ai, noinoi ai, heimodai ai, emui ura na Dirava ba hamaorolaia.

<sup>7</sup> Bena Dirava ena maino, eda diba idoinai e hereaiamu mainona, ese lalomui bona daramui baine gima, Keriso Iesu lalonai.

<sup>8</sup> Varavaragu e, orena binai: momokani ġaudia iboudiai, hemataurai ġaudia iboudiai, maormaoro ġaudia iboudiai, ġoevaġoeva ġaudia iboudiai, lalokau ġaudia iboudiai, haridia namodia ġaudia iboudiai, ba haero. Ena namo taina mia ġauna, eiava ena heimodai taina mia ġauna, ba haeroa.

<sup>9</sup> O davariva ġaudia, o abi daeva ġaudia, egu ai o kamonaiva o itava ġaudia, unu mo ba kara; bena Maino Diravana ese baine bamomui.

<sup>10</sup> Lohiabada lalonai na moale badamu, vada o lalolaigu loumu dainai. Dibagu o lalolaigu gunava, to asi emui dala ta.

<sup>11</sup> Egu ogoġami na asina herevalaiamu; badina be vada na manada, egu ai e miamu ġaudia baina moalelai.

<sup>12</sup> Ogoġami dibagu; taġa danu dibagu. Ĝabu iboudiai, ġau iboudiai, bogakunu bona hitolo, taġa bona ogoġami, vada na manadalai.

<sup>13</sup> Goada e henigumu Diravana dainai lau na ġau iboudiai ikaradia ai na goadamu.

<sup>14</sup> Ĝau tamona, egu hisihisi lalonai o kahagumu be namo.

<sup>15</sup> Filipi taumui e, umui dibamui, sivarai namo iloalaina na matamaia negana ai, Makedonia na rakanaria murinai, ekalesia oreana ta ese ikaha-laigu ġaudia ihenidia bona iabidia herevadia se gwaurai, umui mo sibomui.

<sup>16</sup> Badina be Tesalonika ai na nohova ai, umui ese egu ogoġami ikahalaina ġaudia o siai loulouva.

<sup>17</sup> Dia herahia ġauna asina tahuamu, a huahua hari na tahumu, ihanamolaimui ġaudia ai baela huahuadia.

<sup>18</sup> Lau na vada na abi vaitani; egu ġau na momo. Badina be Epafroditu ese emui amo e mailai ġaudia vada na abi; bonadia nanamo ġaudia, boubou ġaudia, Dirava ese e abi daemu mai moalena ida.

<sup>19</sup> Egu Dirava ese o dabumu ġaudia baine henimui ġuġuru, ena kohu herea-daedia, Keriso Iesu lalonai baine henimui.

<sup>20</sup> Tamada Dirava baita imodaia hanaihanai. Amen.

<sup>21</sup> Keriso Iesu ena helaġa taudia iboudiai ba ha-henamo henidia. Varavarada dekegu ai e nohomu ese e hahenamo henimumu.

<sup>22</sup> Helaġa taudia iniseni ai, haida danu Kaisara ena rumu ai e nohomu, iboudiai ese e hahenamo henimuim.

<sup>23</sup> Lohiabada Iesu Keriso ena harihari-bada na laumamui ai baine mia.

**Buk Baibel long tokples Motu  
The Holy Bible in the Motu language of Papua New  
Guinea**

Copyright © 1959-1973 Bible Society of Papua New Guinea

Language: Motu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-10-09

---

PDF generated using Haiola and XeLaTeX on 28 Dec 2024 from source files dated 31 Aug 2023

35028c04-b277-5da3-8163-bb2fd39b90ca